

四庫全書

史部

欽定四庫全書

宋季三朝政要卷六

廣王本末

陳仲微咸淳爲侍左郎官以言事切直罷乙亥除  
兵部侍郎修國史丙子從二王入廣目擊當時之  
事逐日抄錄崖山敗流落安南臨歿有詩曰死爲  
異國他鄉鬼生是江南直諫臣安南國主以詩挽  
之曰痛哭江南老鉅卿春風揜淚爲傷情無端天

上編年月不管人間有死生萬壘白雲遮故國一  
堆黃壤覆香名回天力量隨流水流水灘頭共不  
平壬午歲安南國使入覲因言仲微之事而得仲  
微所著二王首末重加編次以廣其傳

丙子

正月戊寅廣王益王航海

二月廣王益王由海道趨温州二王駐温州之江心寺  
蘇劉義陸秀夫來會時陳宜中海航泊清澳門諸人往

見之共議興復張世傑自定海至同趨三山

三月甲戌二王至福州宣太皇太后手詔廣王昀為天下兵馬都元帥益王昷為副元帥檄召天下諸路忠義同獎王室

五月一日廣王登極于福州升福州為福安府改威武軍為行都之門大都督府為垂拱殿便廳為延和殿詔改元以德祐二年為景炎元年

遙上尊號太皇太后曰聖壽和福至仁太皇太后全太

后曰仁安皇太后少帝曰孝恭懿聖皇帝進冊母淑妃  
為皇太妃封弟益王昺為衛王妹壽和公主為晉國公  
主以九月二十八日為天熙節

陳宜中左丞相張世傑少保樞密副使陳文龍劉黼參  
知政事蘇劉義開府儀同三司殿前指揮使司馬王剛  
中知福安府事是日百官待漏門外門未啓有物哮吼  
聲朝士有驚仆者

黃萬石以北命諭福建歸附邵武降建劔守臣拒之督

府遣兵復邵武萬石遁

壬戌文天祥至自行都除右丞相時國方草創陳宜中專制於張世傑議論不合遂不肯拜議出督

六月以趙潛為江西制置使進兵邵武謝枋得江東制置使進兵饒州李師夔方興張德分道進兵浙東朱浚江西詔諭使毛統由海道至淮約兵會合先是文天祥自通州歸具言太守楊思復欲得海船數百艘可以直趨勤王陳宜中不以為信乃遣毛統之汀州而不以告

天祥統至通州守問文丞相何以無書守怒統幾不免  
統出而通州降矣

七月文天祥開督于南劔時林琦自杭來監丞鄒鳳自  
衢來一時忠義之士莫不翕集

鄒鳳江西招諭副使

分上下三郡備守以王績翁為福建提刑招捕使知南  
劔州任責上三郡備守黃佺同提刑招捕知漳州任責  
下三郡備守

九月文天祥進兵汀州十月行十一月至汀州而行都隨陷矣

十月大元國兵三道趨福州董右丞敖拉齊蒙古岱都督索多元帥張弘範萬戶等兵出江西浙東阿嚙罕元帥王世強招討舟師出福州

大兵直至處州守臣李珣遁

十一月董右丞至瑞安府趙與擇李世達等禦之敗績世達遁趙與擇退屯福安城遂降



教拉齊軍至邵武朱浚趙時賞遁至建寧府執趙崇磯  
張彭老至南劍州王績翁遁

大元兵逼行都陳宜中張世傑備海舟于岸乙巳奉景  
炎帝益王楊淑妃等登舟戊申發舟入海是時正軍十  
七萬民兵三十萬有奇內淮兵一萬由東港入海與北  
舟相遇值天霧晦冥不辨舟得以進至泉州問蒲壽庚  
索軍糧不及應副遂趨潮州至惠州之甲子門駐焉

癸丑阿嚙罕王世強舟師至福安府王績翁為內應王

剛中以城降

朱浚仰藥死

文天祥將兵趨廣東入浙

十二月景炎帝至廣州守臣薛應龍運使姚良臣迎入  
州治作行宮

張鎮孫除廣東經略使後死於難

大元董右丞軍至福安縣趙與擇拒戰敗績死之

己丑大元兵攻興化軍知軍趙文龍不降被執至泉州

蒲壽庚降至漳州知州黃佺通判楊丙以城降至惠州  
文壁降壁天祥弟也

徐直諒遁

景炎帝趨于富場

丁丑

正月文天祥引兵趨漳州謀入衛道阻不通

二月大元國兵檄戍改福安府為福州置宣撫司以潛  
越友王績翁為副使李雄統領諸部軍後李雄作亂殺

潛越友大兵皆去不留一騎

三月文天祥入梅州

四月蘇劉義卒蘇京湖老將雖出呂氏乃心在王室永嘉推戴實建大功後世傑用事志鬱鬱不得展其人剛躁不可近然能服義終始不失大節而廣中厲氣傳染而死哀哉

五月文天祥兵出梅嶺吉贛兵皆來會六月大捷于雩都復興國縣於是駐屯遣兵攻贛州諸縣皆復惟城不

下龍泉縣孫臬以邑歸正遇害永新縣令彭震龍以邑歸正遇害架閣蕭明以贛縣義兵收復萬安縣被執死于洪督幹陳子敬招集義兵屯皂據贛下流吉水永豐以次皆復前京尹吳浚以北兵說降天祥集將吏責以大義斬之

淮西兵復黃州復壽昌軍

六月文天祥兵至吉州戰于終步不利戰于永豐又不利戰于空坑大敗未幾攻贛之兵又敗行府孤立空坑

之敗全軍陷沒天祥妻歐陽氏男佛生環生女柳娘環娘妾黃氏顏氏被執幕僚張汴等皆死江西招討趙時賞寺簿劉洙架閣吳文福督幹林棟皆遇害天祥與長子道生客杜諸以數騎免時處置安撫聚兵數萬在永豐境天祥引兵就之會其軍亦潰收散兵復入汀而南劔建寧邵武多有歸正者諸畬軍皆騷動尋為諸路大兵收復天祥兵出會昌趨循州是冬天祥兵屯南嶺是月大元兵撤戍張世傑回潮州以圖興復

七月壬申張世傑圍泉州將淮軍及吊眼許夫人諸洞  
畚軍兵威稍振蒲壽庚閉城拒守興化陳瓚起家丁義  
民五百人應世傑八月謝洪永任進攻泉州南門不克  
而蒲壽庚陰賂畚軍攻城不力而求救於索多元帥王  
績翁亦遣人至索多處趣兵

十一月丙申索多元帥大兵至福州甲辰至興化守臣  
陳瓚不降城陷大軍屠城三時乃止血流有聲車裂瓚  
五門以徇至泉州張世傑解圍去至潮州守臣馬發堅

守不下索多元帥棄而之惠州與西省呂師夔軍會合  
攻廣州城陷張鎮孫死之

大軍至次仙澳與戰得利尋望南去止碕川碕川屬廣  
之東莞縣與州治相對但隔一水

十二月景炎帝舟遷于謝女峽陳宜中捩拖之占城

戊寅

正月遣舟師防遏海道

己酉索多元帥自廣州回再攻潮州馬發固守凡半月



至二月癸亥城陷馬發死之屠其城

二月大軍檄戊景炎帝由海道再回廣

三月文天祥兵出惠州海豐縣駐麗江

四月戊辰景炎帝崩于礪川

衛王本末

戊寅

四月庚午衛王即位于礪川景炎帝既崩官將欲散獨  
尚書陸秀夫不可曰諸君散去可也度宗一子尚在將

焉寘此古人有一成一旅興者今百官有司軍士亦且  
萬餘人若天道未絕趙祀此豈不可為國耶乃相與奉  
衛王即位于樞前

改元祥興時有黃龍升天

以陸秀夫為丞相張世傑太傅文天祥少保

六月祥興帝遷于崖山崖山在海中兩山相對勢頗寬  
廣中有一港其口如門可以藏舟世傑以為形勝之地  
乃屯駐於此

造行宮六月入山伐木造軍屋十間起行宮三十間內正  
殿以揚太妃故立名慈元殿時官民兵除逃竄死亡外猶  
計二十萬多於船上住坐資糧取辦廣右諸郡海外四州  
拘刷人匠蓋海院造船隻治兵器自六月至十月始罷  
十月文天祥引兵至潮陽平羣盜人心翕然

大兵至崖山張萬戶舟師自海道入廣過崖山有龍橫  
海舟不得前射之雲霧晝晦遂退攻潮陽

姚良臣為右丞相夏士林參知政事王德同知樞密院

張德為殿前都點檢

十一月文天祥兵潰被執時元帥張弘範以水陸兵奄至潮陽天祥引避山谷行且數日弘範以輕騎直趨掩其不備天祥被執服腦子二兩昏眩久之竟不死越七日至帥營天祥踴躍請劍曰此吾死所也元帥必欲以禮見天祥曰吾不能跪吾嘗見巴延阿珠長揖而已或曰奈何不拜天祥曰吾為國死何拜爾為張知不能屈遂以平揖相見蓋歲除前三日也明年正月二日張元

帥脅天祥下海州十日至崖山元帥令天祥以書招世  
傑天祥曰我不能救父母乃教人背父母得乎有死而  
已不能從也乃作詩復命云人生自古誰無死留取聲  
名照汗青忠國之心終始弗替元帥又謂天祥曰國亡  
矣政使殺身為忠誰復書之天祥曰商非不亡夷齊自  
不食周粟人臣各盡其心何論書與不書元帥為之改  
容乃驅之過北道經吉州痛憤不食八日不死乃復食  
十月至樞密院引問天祥酬對不屈繫獄月餘再引問

愈不屈留燕經年至至元壬午朝廷賜死猶南面而跪  
念念不忘君父若是耶張毅甫負公骨殖歸葬至之日  
母夫人之柩同日至自廣州人謂忠孝所感天祥年四  
十七而歿為人豐下兩目炯然善談論有忠孝大節自  
起兵勤王以至高亭引見議論不屈忠肝義膽出於至  
誠聞之莫不興起驅之北行京口得脫間關萬死由海  
道還國赤手起兵又經三年江西之役大事幾集英雄  
無用武之地卒以困敗或謂子明知其不可為而為之

譬猶父母有病證已難療豈可聽其自斃而不求醫投  
之七劑猶望其可以更生是烏可以成敗論哉所居對  
文筆峯自號文山為文章未嘗屬稿引筆滔滔不竭尤  
長於詩有指南吟嘯集行妻歐陽氏亦守節而死天祥  
為祭文曰忠臣不事二君烈女不更二夫天上地下惟  
汝與吾天祥弟璧知惠州奉母夫人就養歸附後厯廣  
西宣慰使天祥歎曰兄為國弟為家各行其志云

丁未葬景炎帝于崖山

巳卯

正月辛酉大兵攻崖山張世傑不守山門集舟千餘作一字陣禦之而大兵入山門作長蛇陣對之崖山有船千餘艘內大船極多張元帥大小船五百而二百舟失道久而方至行朝依山作一陣幫縛不可復動於是不可以攻人而專受攻矣張元帥至崖山港外停舟喚張世傑打話不從又令文天祥以書諭世傑天祥不從時陳宜中如占城乞師久不還張元帥語崖山人曰汝陳



丞相已去文丞相且為我所執汝何戰云約二月初六日大戰

二月癸未我師敗績大元軍絕其薪水道崖山人食乾飲鹹者十餘日皆疲乏不能戰大元軍乘潮而進兩軍大戰半日南軍大敗世傑乘霧雨昏冥擁祥興帝及楊太妃脫去

丞相陸秀夫抱宋衛王赴海死陸秀夫字君實文筆英妙自維揚幕入朝京師永喜推戴有力及駐崖山凡朝

廷事皆秀夫潤色綱紀之秀夫至此知無可奈何乃取  
舟中物悉沈之仗劍驅其妻子赴水妻挽舟不可赴水  
秀夫曰爾去怕我不來於是登御舟啓上曰國事至此  
陛下當為國死太皇后辱已甚陛下不可以再辱抱宋  
衛王俱投水中御舟一白鵬奮擊躑躅哀鳴良久竟與  
籠俱墜水中內翰劉鼎孫侍郎茅湘吏部趙樵等溺者  
數萬張世傑奉楊太后以小舟奔四日遇大風舟將及  
岸矣舟人催舟師疾進世傑曰無以為也為我取瓣香

來香至仰天呼曰我所以為趙氏者亦已至矣一君亡復立一君今又亡者我奉皇太后走者庶幾敵兵退別求趙氏立之以存趙祀耳今若此天意果何如耶若天不欲我復存趙氏祀者則大風覆吾舟舟遂覆

宋傳天下以仁而國勢嘗病於不振孝宗自謂我朝家法遠過漢唐惟用兵一事不及蘇洵論勢亦謂惠褻而威不振賞數加於無功敗軍之罰不加嚴弱勢浸淫其來非一日然渡江以來君無失德理宗朝四

川殘害三面被兵淮甸擾攘雲南有警左支右吾猶能扶持四十二年之天下度宗嗣位一國之事權奸賈似道實專之度宗崩太皇太后與幼君不過建空名於六服之上且如己未庚申渡江東南之危如一髮之引千鈞似道在鄂城下之盟許納歲幣而大元之師始歸似道乃欺理宗詭曰戰勝而歲幣又食前言及大元遣使責償拘留真州不報又遣使荆湖而似道又留之漢陽之純口始則請盟終則背盟似道

知之天下知之獨朝廷不之知爾宋太祖常曰宰相  
須用讀書人似道以寵妃之弟不學無術處非其任無  
休休有容之量忌嫉之念橫於胃臆好諛惡直進佞  
退賢粉飾太平諱言邊事殺功臣以失士大夫之心  
行公田以歛江浙之怨主推排以騷動東南之民造  
士籍以鉗制東南之士庇敗將則將校之心離各軍  
券則軍旅之心叛日積月累無非失人心之事人謀  
之不臧如此雖然國之興亡亦有天數與天理存焉

爾邵雍著皇極經世書推明皇帝王伯之數有元會  
運世之說謂冬復為春世復為元今大元溷一揭宋之  
土地而歸職方國號曰元年號曰元豈非世復為元  
之數乎宋以周顯德七年受禪至十六傳而幼君名  
顯改元德祐合顯德二字彰著於命名改號之間人  
不之覺豈非數之終於此乎前宋以丙午丁未而遭  
金禍推論五行者謂宋以火德王故能水勝火其後  
丙午丁未則上下兢兢以度厄運今以丙子丁丑歸

大元豈非子者午之對丑者未之對而納音亦有水  
勝火之義乎宋有天下圖讖久有過唐不及漢之說  
漢四百一十一年唐二百八十六年宋自建隆庚申  
開基至德祐乙亥凡三百一十六年豈非過唐不及  
漢之應乎此天數之應如此宋太祖受周太后恭帝  
禪杜太后將終召太祖曰汝自知所以得天下乎政  
由柴氏使幼兒主天下羣心不附若周有長君汝安  
得至此豈料三百年後似道貪權利於立幼卒至覆

國是亦其初取於孤兒寡婦之報也宋待柴氏最厚  
事太后如母撫幼君如子恭惟大元待宋后幼君禮  
意猶篤是亦其初待柴氏之報也國既為宋柴氏族  
屬並無誅戮崇義之封終三百年如一日今大元於  
趙氏於族屬一無所間亦其初不殺柴氏之報也大  
祖之入京城兵不血刃市不易肆列國諸郡聞風而  
降今大元兵鋒所至降者不殺過江以來迎降恐後  
郡縣城邑市井依然是亦其初不妄殺人之報也此




天理之報者如此宋太祖生於丁亥以庚申歲建國  
命曹彬平江南王師係甲戌歲渡江以乙亥丙子而  
平江南丙子歲是為開寶九年今大元太祖聖武皇  
帝亦生於乙亥以庚申歲即位命巴延平江南大軍  
亦係甲戌歲渡江以乙亥丙子而平江南丙子歲是  
為至元十三年宋太祖得國之時有讖云十一卜人  
小下月十五團圓十六缺至幼君恰十六傳亦非偶  
然國之興亡係乎天數而亦關於人才之盛衰太祖

開基人才輩出列聖相承國致平治自王呂擅權章  
蔡用事小人夤緣為姦或為爪牙或為鷹犬或號傳  
法沙門或稱護法善神釀成靖康之禍高宗中興倘  
無張韓劉岳之徒幾不可為國矣而時有中興之臣  
而無中興之君惜哉度宗以來內無賢相外無良將  
雖有忠良之臣反擯弃而不用束手待斃可為長太  
惜可為流涕者也然忠節之士何代不有疾風知勁  
草板蕩識純臣語曰無求生以害仁有殺身以成仁

孟子曰捨生而取義信哉蓋死者人之所難而得其死者尤難也主憂臣辱義在必死夫食君之祿死君之難不以生死易其節此誠烈丈夫也嗚呼故臨難守節者常足以動敵國之敬歎蓋忠義亦人心所固有也符秦之攻晉也嘗歎曰周孟威不屈於前丁彥遠潔已於後吉祖冲閉口而死何晉氏之多忠臣也金人攻宋見李若水死節歎曰南朝惟李侍郎一人然靖康之難死節五十餘人忠魂義魄至今耿耿斗

牛間史為直筆安能為斯人隱今大元混一識天時  
而歸附者固皇帝之所嘉盡臣道而死節者亦皇帝  
之所重豈可弃而不錄哉其間死城郭封疆者固不  
能盡知其所知者若李芾死於潭天祥死於北庭芝  
死於兵唐震昂發死於郡治江萬里徐應鑣鄧得遇  
尹穀赴水死謝枋得不食死朱浚仰藥死其他如姜  
才孫虎臣邊居誼牛皐范大順張漢英趙文義王安  
節馬堅馬發陳瓚米立趙孟錦司馬夢求其中儒臣

死節尤表表在人耳目間歐陽脩作五代史謂吾於  
死節之士得二人焉今數人者史氏亦當以歐陽之  
筆表而出之庶可發潛德之幽光云



宋季三朝政要卷六